

**Atham iaine ul woRoma
Atham ammakka oPoluc
pokurrinet ul wonoka'ran
koRoma
Lon lonothon**

Pul pothothilettat poIeccuo oPoluc pokurrinet ul ioccoke the lon loMiccie ka'ramacak engki ikokat noka'ran koRoma akka kwokat pongothe itti kwakenekin lon ila kwongkenet na'ran w'rek. Kwokenet kicce itti lon iloporot loIeccuo lakene tat akka Kapik konat ul nomothok apik akwonane ka kung akka okin thoccoke the lon nomikit ila kwokkothe. Ana kwokenet ul woIouth ioccoke the lon loMiccie itti lon len cakuruk lokat inatham noma'rot, ana ul iannoka woIouth wakkwokenet itti lon len lakorronno kin akin oka ul woKapik. Kwakene itti Kapik kothikkiet ton thoporot ntit tokit kung, othakka itti aron okorronno ennekke itti oron thapiriek noka ntho'rumo nolon lothonce'ret lon cik ngka konnon. Anaruk amma oron thokorronnot Kanang ikupupure akonyarttie thikkoik thonon, oron thikkoik ammakka Kapik kongothe itti oron thikkoik.

OPoluc paik pacimitto ul itti wikkoik ammakka ul ioccoke the lon loMiccie. Kweret thongat ul w'rek, ana manna okkwion ithannangkot lon lonnon ana manna ithakkietton thiak (Ku'rathal 12-15). Ana ocothot p'rin kwomiccot opurukon noka'ran koRoma n'ran wen (Ku'rathal 16).

Lon loPoluc ila kwothinthet ul woRoma

¹ Oun oPoluc iparekine oMiccie oIeccuo ana oun ipakkarakat itti anothakka pul pothothilettat pung anongkene ul lon iloporot loKapik, ² ila konekketheik ncima'rot nnul wothernte lon loKapik inatham inupupure, ³ ileret ukul wung oIeccuo oMiccie iothakkat pul iponyi ana iokwontat nti ithiki thoThauth. ⁴ Ana ook ipokenettat ngKanang ikupupure itti ook ukul woKapik ana nthuroko thung nti ithio, ook oIeccuo oMiccie Ili wonnon. ⁵ Ana oron thipakat thiak then nti ilon lung ana k'ran kung ana ekko nan itti oron thathakka ul wothothilettat woleccuo, aron akkaro ul nti iul iakannoka woLouth akin occikot thoccikot ithanthan nolon lothocokot lon nocikit. ⁶ Ana onon acakuruk thaik iul iakkarakat athoka ul woleccuo oMiccie.

⁷ Mpaik pakurrinenon appik ul wonoka'ran koRoma iaKapik kongothe ana kakkarot itti athakka ul iupupure woKapik. OIeccuo oMiccie pethet non thoporot ana lon iloporot loKapik oNgappa ponnon.

OPoluc pongothe itti kwathomirikot ka'ran koRoma

⁸ Cittokit mpongothe itti mpapirane Kapik kin noka ana oIeccuo oMiccie akkathikkie lon icat akka thocokot lon nomikit thon thap-paththatheik nocapu ncik appik.

⁹ Kapik ika mpaik parekine ncikit culukku nthongkene tholon iloporot lokkul wung, iken akkina nan itti mpaik pakwarttikot non ¹⁰ ia'rama ngngin appinappin, ana mpu'ran

poKapik mpongothe itti kanyinin kathar anothomirikot non.

¹¹ Mpaik pakwancot kathar ika animma non ngngin, othakka itti anethet non lon loKangang ikupupure akothikkienon thonthomat, ¹² elli lonu itti onon ana oun thittararot nthocokot lon nomikit monnon aron oka thonthomat. ¹³ Pangkingon, mpongothe itti onon thina nan itti mpenekket ma'ri moppot itti mpathomirikot non (anaruk mpolikakinet cik manna ina) othakka itti anetherene ul lon loleccuo ianon ammakka mpokkothe iul iakannoka woIouth w'rek llon loleccuo.

¹⁴ Akka mponu itti mpangkene ul appik woKrik ana iakannoka woKrik iinaik nti ima ana ikan-noka winaik. ¹⁵ Ilen akka mpongantset itti mpathongkenenon cakuruk lon iloporot loleccuo onon ithaik noka'ran koRoma.

¹⁶ Mpakannothiane thongkene lon iloporot loleccuo cik akka len pu'ran poKapik potho'ret thoul appik okkwion ithocokotho lon nomikit, cittokit ul woIouth ana ul iannoka woIouth.

¹⁷ Akka lon lothothakka poporot tokit koKapik lokenettat ilon iloporot loleccuo, thoporot nthocokot lon nomikit noca'ri conomun oingkan-thet noca'ri icocothothe. Ammakka lokurrakot iatham itti "Pul ipoporot tokit koKapik pakkoik nthocokot tholon loKapik nocikit."

Thuaka thoKapik

¹⁸ Kapik kokenet tat akka kua ka ntothi'rot nolon loul iammakot lon lonocapu ana ul iokithak ia'rumot lon iloporot llon ilokithak.

¹⁹ Akka lon ilakin thouu itti okin thina loKapik laik apparthak tokit ken aKapik akkonekketheik apparthak tokit ken. ²⁰ Akka ammakka Kapik koku'ret capu ncik appik, Kapik ngka kung ikom-makot nan ana pu'ran pung pothupuththuput ipakannoco'ro, ook Kapik icaricat, kimmakot kicce ana kinakot llon ila kokkothe, othakka itti aul ella lon cik itti okin thomma ilaik.

²¹ Antoka manna itti okin thinat Kapik, okin th'rat omereket Kapik ana manna opiriek noka, anaruk thokwarttikot cik then thokat lon lulluk ilella lon cik ana mikit men imommaik mokat i'rimak. ²² Antoka manna itti nthinnikothe itti okin thinaik anaruk okin thothakkakathe thommaik. ²³ Ana okin thokucittathe thrik thoKapik cik akin a'rane urrut iokat cik wungkot ul ionyi ana u'rupe ana a'rupu worikira ana a'rupu iauru nga'rama.

²⁴ Anakka ul wommat cik nti ima, Kapik kokorronathekin akin ongat lon ilokithak ammakka tha'ro nnul nuthuk ana okkarot lon noka ken ilokithak. ²⁵ Okin thopa'rinet lon loKapik cik ilaik icat akin ere lon ngkarra ana a'rane a'rupu wonocapu nga'rama iokkattathe nynyaun akin okorronno Kapik ikoku'ret capu ncik, ook ipamerekettat thupuththuput, Amin.

²⁶ Ana nti ilon elli appik Kapik kokorronathekin akin ongat cannan itti okin tha'ro nnul iomura, ana manna ul iari wen woporttot tha'ro then nul iomura akin a'raro nngin ithari. ²⁷ Ana menik cakuruk ul iomura wokorronnot tha'ro nul iari akin a'ro nul iomura. Ana ilen akka okin thattattakinnet llon lokithak nti ilon len ilakin thokkothe.

28 Anakka okin thakannokwairttikot cik papenang nolon loKapik, Kapik kekathekin ngathe're ngokithak akin okkot lon ilonu itti lakannokkattat. 29 Okin thothakkakathe ul ionu lon lulluk ilokithak ima ammakka thirik nan ana ngathe're nyokithak. Okin th'rat ul, okin thangwo ul, okin thathatto iul, okin thammikkot ana okin theret ul. 30 Okin therettot llon lokithak, okin th'rat Kapik, okin thacungkaro, okin thipot ka thoura, okin thakwancot kathar ikakin okkot lon ilokithak ngngin, okin thakannocikot lon loththangon ana lonnangon. 31 Okin thommaik ana okin thakorronno ere lon ilaik icat, okin thakannocokot lon nomikit ana ella thiak thoul w'rek. 32 Ana manna okin thina itti Kapik ki'ret itti okkwion ithakkot lon ammakka elli okin thille ana okin tho'rungkwathe nan okkot lon elli anaruk okin thikkatheik akin ongkene opilingon itti okin thakkot tat.

2

Thakkma thoKapik

1 Ittina onon thella lon cik ilanon akkma opilingon ngngin, akka lon ila akkmak ngngin ngkwaik pakkma ka kang, akka onon ithaik thakkma thaik thakkot menik cakuruk. 2 Akka oron thina itti thakkma itha Kapik akkma ul enni ngngin thakkmako llon ilaik icat. 3 Ana oung empirik amma akkma ul angkwaik akkot lon len, ngkwame itti ngkwalukkwot thakkma thoKapiki? 4 ngkworakket thoporot thungi ana thonongkwot ilon thungi? akorronno ina nan itti Kapik nthongat thung nthoporot thung enthi itti ngkwapa'rine lon cik ilokithaki?

⁵ Anaruk akka onon thonthomat ma ana mikit imakannopa'rine lon cik ilokithak, onon thaik tha'rntinthe ka kon thua ka ithokithak noca'ri ica Kapik athokene ul thakkma thung ithoco'rotheik. ⁶ Kapik kethet ul loporot nngre iakin thokkothe. ⁷ Ana ul iokat cik akkot lon iloporot wokat cik akwancot thrik ana thothiakine cik ana thikkoik thothupuththupu ana Kapik kethet kin thikkoik thothupuththuput.

⁸ Anaruk okkwion ithongothe lon lokaken ana 'ra lon ilaik icat akin ommakot lon ilamoloko, Kapik kua ka ken. ⁹ Ul iakkot lon ilokithak wakinnikkoik woporot ana anganna ul woIouth cittokit ana ul iakannoka woIouth ¹⁰ anaruk thrik ana thothiakine cik ana thoporot thaka noul iakkot lon iloporot ana anganna ul woIouth cittokit ana ul iakannoka woIouth. ¹¹ Akka Kapik kakannicat nopul p'rek amma akakkma. ¹² Okkwion ithokkothe lon ilokithak, akin thellat lon lothonce'ret lon cik loMucca okin thille akin okorronno once'rettanthe lon cik lon lothonce'ret lon cik loMucca, okkwion ithillet akin thonat lon lothonce'ret lon cik loMucca okin thance'rettanthe nthoce'ret lon cik thoMucca. ¹³ Akka okorronno oka okkwion ithaccikot lon lothonce'ret lon cik loMucca akkaka thoporot tokit koKapik anaruk okkwion ithathiane lon lothonce'ret lon cik akki'rettat itti okin thoporot tokit koKapik. ¹⁴ Amma ul iakannoka woIouth iella lon lothonce'ret lon cik loMucca wikkoik akkot lon iloporot laka ere lon lothonce'ret lon cik len antoka manna itti okin thathonce'ret lon thoka ken lon cik loMucca ¹⁵ ittina okin thaik thakene itti lon lothonce'ret lon cik loMucca laik nomikit men ana ima men ana mikit men maik

makene itti laik icat ana thokwarttikot cik then thaik thakene itti laik icat ana manna thrrot nakin ana athourkwet kin. ¹⁶ Elli lakaik noca'ri amma oIeccuo oMiccie athakkma ul mpu'ran poKapik ammakka lon iloporot loIeccuo li'ret.

Ul woIouth ana lon lothonce'ret lon cik

¹⁷ Ana onon enthrik ithamet ka kon itti onon ul woIouth ana onon occot kit nolon lothonce'ret lon cik loMucca ana othingkako ngk'ran koKapik itti kon ¹⁸ onon thina lon ila Kapik kongothe itti onon thakkot ana onon thinat nolon lothonce'ret lon cik itti onon thakkot iloporot nolon ilokithak, ¹⁹ Ana onon thina itti onon akkaik thitte ul i'rimathe ana ona ul iaik i'rimak ²⁰ ana okene ul cik iommaik ana onkene nyukul inyarran akka onon thina lon lothonce'ret lon cik loMucca kicce ana lon ilaik icat ²¹ ittina onon ithangkene opilingon, onon thakannongkene ka koni? Onon ithangkene ul itti thu'ran thokithak onon thakan-nomunyei? ²² Onon ithi're itti ul wakanna'ro nul iari ittat, onon thakannalle nul iari ittari? Onon ith'rat nikkilan ana onon omunye a'rupu noppa toKapiki? ²³ Onon ithaik thipot ka thura kothonce'ret lon cik loMucca, onon thaik thakorronno orakke lon loKapik amma anon orakke lon lothonce'ret lon ciki? ²⁴ Ammakka lokur-rakot iatham itti, "K'ran koKapik kaul iakannoka woIouth wocungkwot nti ilon lon."

²⁵ Thokekot thoporot amma ngkwaccot kit nolon lothonce'ret lon cik papenang anaruk amma ngkwakannocot kit nolon lothonce'ret lon cik len, ngkwikkoik ere pul ipakannoekkot. ²⁶ Ana amma ul iakannoekkot waccot kit

nolon lothonce'ret lon cik ilathokekkot thongothe itti langwuttat, okin thakannokathako ere ul iokekkothei? ²⁷ Okkwi ipakannoekkot ana icci kwaik paccot kit nolon lothonce'ret lon cik, kwakannoce'renthe non lon ciki? Onon thoIouth ithorakket lon lothonce'ret lon cik, ana manna onon thonu lon ilokurrakot ana onon thokekkothe anaruk onon thorakket. ²⁸ Pul pakannoka pul poIouth amma pokekkothe tulluk. ²⁹ Anaruk pul paka poIouth nthocokot lon nocikit loIouth ana thokekkot itti cikit cung co'rillir ngKanang ikupupure koKapik, annoka llon lothonce'ret lon cik loMucca. Katha pul ammakka pen paKapik omereket, annoka pul iponyi akkamereket.

3

Kapik ka'rumo nolon

¹ Ngintha akkoprot amma ngkwothakkat pul poIouth? Ana ngintha akkaka pokithak amma ngkwakannoekkot? ² Loporot llon loppot itti lon loKapik lerettanet ul woIouth cittokit.

³ Laka taththa amma opilingon thellat thocokot lon nomikit loKapik? Thella lon nomikit then thakorronno Kapik akokorronno occot kit nolon ila konekketheiki? ⁴ Aa, okonnoka menik Kapik kakannere lon ngkarra anaruk pul iponyi pere lon ngkarra. Ammakka lokurrakot iatham itti,

“Othakka itti alon lang oka loco'rotheik amma aere

ana alkot lon ila ngkworukwettathe ngngin ilokithak.”

⁵ Anaruk amma lon lonnon ilokithak lana tho-
porot thoKapik papenang oron thame taththa?
oron thame itti Kapik engki kakannoco'rot lon
cik akka kua ka naroni? Mpaik pa'retto karkko
pul iponyi. ⁶ Okonnoka menik amma arokat it-
tina Kapik kakkma capu taththa? ⁷ Opilin manna
pi're itti, “Amma ngre ngin iamoloko nginie lon
loKapik ana arttot nothrik thung, ngintha akka
anakmakine karkko pul iponu lon ilokithak?”
⁸ Ana ngintha akka oron okorronnokkinthet lon
ilokithak othakka itti alanthan iloporot? Opilin-
gon thocungkwot nin ana orukwethin itti mpi'ret
lon len. Okin thakkmako ngkathar ikakin thonu
itti okin nthakkmako ngngin.

Pul pella poporot

⁹ Lon len lacothakot taththa? Oron ul woIouth
akkoporot noul iannoka woIouthi? A Aa, okon-
noka menik onin thokenet non ntit akkomencen
itti ul woIouth ana iannoka woIouth waik ilon
ilokithak appik. ¹⁰ Ammakka lokurrakot itti,
“Pul pella ipoporot manna pulukku.

¹¹ Pul pella ipina lon

pella ipaik pakwancot Kapik

¹² Okin appik thopa'rinet Kapik cik

ana okin appik theot ikathar koka,

Pul pella manna pulukku ipaik pakkot lon lo-
porot.”

¹³ “Lon len lakkunako ere utha wonupu noul
iillet

ana lu're len lere karra kulluk.”

“Lon len likkoik ere ngee ngoinyil.”

14 “Lon len loppapathe nthattatta ana lokithak.”

15 “Okin thallot tothietto ka kongo ana onguttetto cokocokot.

16 okin thipot thukungkun cik, na akin eo ana okittoik

17 Okin thomma thikkoik ngkathar ikoporot aththik.”

18 “Okin manna thakannothiane Kapik cik aththik.”

19 Oron thina inenni itti lon ila lon lothonce'ret lon cik laik lere leret ul iaik wammakot lon len, othakka itti aul angkoik ana capu occokot lon loKapik.

20 Ittina pul pella pi'rettat itti poporot tokit koKapik akka kwaik pammakot lon lothonce'ret lon cik anaruk nthommakot lon lothonce'ret lon cik, pul pina amma pokkothe lon ilokithak.

Thoporot nthocokot lon nocikit

21 Anaruk inenni thothakka thopul poporot thanthan noKapik, okonnoka nothommakot lon lothonce'ret lon cik. Antoka manna itti ul wothernte lon lothonce'ret lon cik werethe lon ana thonce'ret lon ncik thoMucca therethe lon len cakuruk. 22 Kapik kathikkie ul woporot tokit kung ioccoothe lon nomikit loIeccuo oMiccie akka okin thulukku tokit kung. 23 Akka oron ap-pik thokkothe lon lokithak ana oron thokakathe

ciththan nothrik thoKapik ²⁴ ana Kapik kothikki-
etton thoporot appik nuthuk nthoporot thung nti
ithokke ithaat naIeccuo oMiccie itha kwokkenet-
ton. ²⁵ Akka Kapik konarok othakka itti akwathio
nti ilon ilokithak lokkwion ithoccokothe lon lung
nomikit ana Kapik kokkothe elli othakka itti
akokene itti thoccokot cikit ilon thung thokat
thoporot ana kwocikanthet ul lon ilokithak
²⁶ kwokkothe ittina akwokene thoco'rot cik
tholon thung noma'ri emmi othakka itti akwoka
pul ipathikkie okkwion ithoccokothe lon loIeccuo
oMiccie nomikit thoporot.

²⁷ Ngintha akka oron ipinthe ka thoura?
Papella ana lon liatha akka oron ipinthe ka
thoura? Othakka itti akka oron thaik tham-
makot lon lothonce'ret lon ciki? A a, okonnoka
menik anaruk nthoccokot lon nomikit thoIeccuo.
²⁸ Akka oron thina itti pul iponyi pathikkietta
poporot nthoccokot lon loKapik nocikit okon-
noka nthommakot lon lothonce'ret lon cik lo-
Mucca. ²⁹ Kapik koul woIouth tulluki? Kakan-
noka Kapik koul iakonnoka woIouth cakuruki?
Ii iken koul iakannoka woIouth cakuruk ³⁰ Ina
akka Kapik kaik kulukku ikathikkie pul poIouth
ana ipakannoka poIouth poporot tokit kung
nthoccokot lon nomikit thung. ³¹ Oron thonu
itti oron thapa'rine lon lothonce'ret lon cik nti
ithoccokot lon loKapik nomikiri? Aa, okonnoka
menik anaruk oron thonu itti oron thammakot
lon lothonce'ret lon cik loMucca papenang.

4

Thoccokot lon nocikit thAprein

¹ Oron theret Aprein oththan pothiki thonon taththa? Ngintha akka kwinat nti ilon len? ² Amma icaricat Aprein pokat pothikki-ettat poporot nti ire ngung, kwonat lon cik ila kwipot ka thoura ngngin anaruk okonnoka tokit koKapik. ³ Akka lokurakot iatham itti, "Aprein poccoke the lon loKapik nocikit ana lothikkiekathok poporot tokit koKapik."

⁴ Inenni amma pul oreko, a'rupu iakin ettat nti ire wakannoka nuthuk anaruk nti ire iakin thorekot. ⁵ Anaruk pul ipakannoreko anaruk aponekktet cikit noKapik ikathikkie ul iokithak woporot, thocokot lon nocikit thopul pen thathikkiek poporot. ⁶ OThauth peret menik cakuruk akka kwere the thethie thopul ipa Kapik othikkie poporot okonnoka nti ire ngung tulluk, ⁷ "Loporot nakkwion

itha Kapik koccikin thet thukungkun then ana lon len ilokithak lo'rumako the.

⁸ Loporot nopol

ipa Kapik kakannongantene lon ilokithak lung kirrkkir."

⁹ Thethieko thoul iokekko the tulluki ana okonnoka thoul iakanno kekkori? Onin thokat cik anin ere ina itti Aprein pokat pettathe thoporot nti ithocokot lon nocikit thung. ¹⁰ Elli lokat cik acintha? Lokat cik akkwokekkothe ntiri? Lokat cik akkwarthuk okekkori? Lakannoka akkwarthuk okekkot anaruk akkwokekkothe ntit. ¹¹ Ana kwokekka the othakka itti aloka lon ilakene itti kwokat poporot tokit koKapik, thoporot itha kwocot nti ithocokot lon loKapik

nocikit akkwarthuk okekkot. Elli lokat cik othakka itti akwoka oththan poul ioccoothe lon loKapik nomikit akin thakannoekkot ana othakka itti athoporot oka thokkwion ithakan-noekkot cakuruk. ¹² Ana ook oththan poul ioekkothe appik ana iakonnoekkot anaruk oththan poul iaik wammakot kathar kothoc-cokot lon nocikit thongappa Aprein itha kwonat akkwarthuk okekkot.

Thonekkes lon cik thinako nthocokot lon nomikit

¹³ Aprein ana opeon thakannonekettan-thet lon cik itti okin thapakkot nocapu, othakka itti akka okin thokat akin ommakot lon lothonce'ret lon cik anaruk nthoporot tokit koKapik ithanthan nthocokot lon loKapik nocikit. ¹⁴ Akka amma okkwion ithikkoik lon lothonce'ret lon cik thapakkot nocapu, thocokot lon loKapik nomikit thella lon cik ana thonekkes lon cik thella lon cik cakuruk, ¹⁵ akka thonce'ret lon cik thana thua ka thoKapik. Anaruk na thonce'ret lon cik thaik, ul wakannocikot lon cakuruk.

¹⁶ Ittina, thonekkes lon cik thao nothccokot lon loKapik nocikit othakka itti aloka nthoporot thoKapik ana athettat nyukul nyAprein appik, akonnoka okkwion thothonce'ret lon cik tul-luk anaruk cakuruk ul ioccoothe lon loKapik nomikit ilakin thocokot nAprein. Ook ongappa ponnon appik. ¹⁷ Ana ammakka lokurrakot itti, "Mpothikkierung oththan poul woppot." Ook ongappa ponnon tokit koKapik ika kwocokothe

lon len nocik̄it, Kapik ken ikethet ul thikkoik iillet ana ikakkot a'rupu iellat cik.

¹⁸ Aprein poccoke lon loKapik nocik̄it ana manna kwellat lon cik, ana o'r̄ikot cik itti kwathakka oththan poul appik, ammakka li'rettathok itti, "Nyukul nyang nyathakka itina" ¹⁹ Thocokot lon nocik̄it loKapik thAprein thakannoropat cik antoka manna itti kwinat nan itti kwocokkat p'rin ponat luput arrial ukuluk pakannokwono, ana opari oCcara pokat poco'rot cakuruk nti inyukul. ²⁰ Ana icci kwakannonakat mik̄it me'ra nothonek̄ket lon cik ila Kapik konekkenthok cik, anaruk kwopo'rathe than ithocokot lon loKapik nocik̄it ana ethet Kapik thir̄ik, ²¹ ana kwinat nan kicce itti Kapik kakkot lon ila konekketheik itti kakkot. ²² Ilen akka "Kapik kothikkiekantok poporot tokit kung." ²³ Lon itti, "Kwothikkiettat" lakannokurrakinok pellek, ²⁴ anaruk lokurrakinēt ton cakuruk oron ithocokoke lon loKapik nomik̄it ikurokiet oIecuo nti ithio, Ili Kapik wonnon. ²⁵ Kwonekittat akwothio nti ilon ilokithak lonnon ana kurokot akwothikkieron thoporot tokit koKapik.

5

Thoporot ana thopira noka

¹ Ana inakka oron thothakkat thoporot nthocokot lon loKapik nomik̄it thonnon, oron thaik iku'ri oron oKapik nti ilon lolli oIecuo oMiccie, ² oron thiothe thoporot enthi itharon thaik ina nthocokot lon nomik̄it. Ana oron thapira noka

itho'rikot cik thothrik thoKapik. ³ Okonnoka ittina tulluk, anaruk oron thapira noka ithoreko thiak thonnon akka oron thina itti thoreko thiak kannan thanongkwiet ton ilon, ⁴ thonongkwot ilon thathikkie pul ponthomat ana thonthomat thakorronno pul apona tho'rikot cik. ⁵ Ana tho'rikot cik thakonnothieron cik akka Kapik konekkethe thongat thung nomikit monnon ngKanang ikupupure ika kwethet ton.

⁶ Akka ca'ri icaron thellat pu'ran cik, oMiccie piinet ton othakka itti akwittarot ton ithella pu'ran cik ana ithakkot lon ilokithak. ⁷ Lonthomat itti pul p'rek pio nti ilon lopul ipoporot tokit koKapik ana manna loporot itti pul pine pul ipoporot. ⁸ Anaruk Kapik kokenet ton thongat thung nthiot thoMiccie nothapak akka oron thokat tharthuk thonat lon ilokithak.

⁹ Ana inakka oron thothakkat thoporot ngüccük ngung, oron tha'rettat nti ithua ka thoKapik nti iaak, ¹⁰ oron thokat tho'rak thoKapik, anaruk kwopakketheron iku'ri nthio thokkul wung. Ana icci oron tha'rettat nthikkoik thokkul wung. ¹¹ Anaruk okonnoka ilen lulluk oron thapirane Kapik noka, Ili wonnon oIeccuo oMiccie okkwi ipopakketheron iku'ri oron oKapik.

OMiccie ana Atham

¹² Ittina ammakka lon ilokithak laat nocapu ncik appik mpul pulukku, ana thio nti ilon ilokithak ana ngkathar engki thio thainet ul appik akka ul appik wokkothe lon ilokithak ¹³ akka lon ilokithak lokat cik nocapu ncik appik alon lothonce'ret lon cik larthuk eettat ul. Anaruk lon

ilokithak lelakot kit ken amma lon lothonce'ret cik lella. ¹⁴ Anaruk thille thokat cik nci noca'ri cAtham, oingkanthet noca'ri coMucca, ul wokat cik aille manna ul iakannokkot lon ilokithak ammakka Atham pokkothe akka kwarrothe lon cik ila Kapik ki'rethok. Atham pokat purrut popul ipaik panthan. ¹⁵ Anaruk thethet thakanoka ammakka lon ilokithak. Akka amma ul woppot willet nti ilon ilokithak lopul pulukku anaruk loporot kannan akka nthoporot thoKapik ana thethet nuthuk ithaat nthoporot thopul pulukku oIeccuo oMiccie, athoine ul appik.

¹⁶ Ana attang thethet nuthuk thoKapik thakanoka ammakka thokkot lon ilokithak lopul pulukku. Akka thokkot lon ilokithak lopul pulukku thonakanthet ul appik thakkmako anaruk thethet nuthuk thoKapik thonat lon ilokithak loppot lommakotho ana thothikkiekathe ul woporot.

¹⁷ Ana amma thio thongwot ul appik akka lon ilokithak lopul pulukku, ittina thikkoik thakaik nopul pulukku cakuruk ook oIeccuo oMiccie ana thaka nakkwion ithacco thoporot thoKapik ana thethet nuthuk thung ithoppot.

¹⁸ Ittina ammakka lon ilokithak lopul pulukku lakkmat ul appik, menik lon iloporot lopul pulukku lothikkiet ul appik woporot othakka itti akkoik. ¹⁹ Ana ammakka nti itharrot lon cik lopul pulukku, ul appik wothakkakathe wokithak ana cakuruk nthocikot lon thopul pulukku, ul woppot wothakkakathe woporot.

²⁰ Lon lothonce'ret lon lokat laat othakka itti alon ilokithak arttakot nan. Anaruk na lon ilokithak larttakotho nan, thoporot thoKapik tharttakot nan kannan, ²¹ Ana ammakka lon

ilokithak lakkmat capu nthio, cakuruk thoporot thoKapik ithathikkieron thoporot oIeccuo ngngin thakaik ana thethetton thikkoik thupuththuput nti aIeccuo oMiccie, Ili Kapik wonnon.

6

Oron thokkot cik nti ilon loMiccie

¹ Ngintha akka oron i're? Oron tha'rungkwot nan okkot lon ilokithak othakka itti athoporot thoKapik arttakinthet ton nani? ² Okorronno oka menik oron thillethe ilon ilokithak ana tat akka oron appo'rungkot nan okkot lon ilokithak?

³ Onon thomma itti oron appik ithoccot mamuthie ngk'ran koleccuo oMiccie oron thoccot itti oron thillet iaak? ⁴ Ittina oron thocikkakot uraththut ca'ri icaron thoccot mamuthie othakka itti ammakka oMiccie pokat purokiettat nti ithio nthrik thoththan, oron thikkoik thikkoik thie.

⁵ Amma oron thothakkat thulukku nthio thung, oron thathakka thulukku ithuroko thung. ⁶ Akka oron thina itti ka konnon ikipe kokkuttathe nothapak oMiccie ngngin othakka itti aka kolon ilokithak opa'roik, aron okorronno oka iak wolon ilokithak. ⁷ Akka okkwi ipiot kwelikkakot nti ilon ilokithak.

⁸ Inenni amma oron thillet oron oMiccie oron thaccokot lon nomikit itti oron thakkoik cakuruk uraththut. ⁹ Oron thina itti oMiccie purokiettat nti ithio ana kwakannappio attang, ittina thio thella pu'ran cik naak. ¹⁰ Akka thio itha kwiot, kwiothe ilon ilokithak ca'ri culukku kirrkkir anaruk thikkoik itha kwokkot cik thakin ikkoik okin oKapik.

11 Ammakka menik, nokatha ka kon itti onon thillethe ilon ilokithak ana onon thokkot cik othakka itti annikkoik annoMiccie oIeccuo. 12 Ittina nokorronno okorronno lon ilokithak ali'riko ika kon othakka itti annokkot lon ila longothe. 13 Nokorronno ethet ka kon k'rek lon ilokithak itti akothakka papu ipakkattat llon ilokithak anaruk nethet ka kon Kapik ammakka ul iokat willet ana wurokiettat nti ithio, ana ethet Kapik ka kon k'rek akothakka papu ipakkattat llon iloporot. 14 Akka lon ilokithak lakorronno alkot non akka onon thakannoka inyaun nyolon lothonce'ret lon cik anaruk onon thaik ithoporot thoKapik.

Lon ilapirie Kapik noka

15 Ngintha pen ittina? Oron thakkot lon ilokithak akka oron thakonnoka inyaun nyolon lothonce'ret lon ciki anaruk oron thaik inyaun nyothoporot thoKapiki? Lakannoka menik. 16 Onon thomma itti amma onon thethet ka kon pul p'rek itti nthaccikot lon lung karkko iak, onon thaiak wokkwi ipanon occikot lon len, antoka manna itti onon thaiak wolon ilokithak ilanekot non ithio antoka manna itti ngkwapiak pothoccikot lon ilanekothung ithoporot tokit koKapik. 17 Anaruk nopirane Kapik noka, akka antoka manna itti onon thokat iak wolon ilokithak anaruk onon thoccikothe thongkene thoKapik ithokat thongkenettat non. 18 Onon thelikkakot nti ilon ilokithak ana onon thothakkat iak wolon iloporot loKapik.

19 Mperet lon elli ngkathar ika ul ionyi ere nggin akka onon thakonnoka thopo'rot than. Ana akka onon thothikkiet ka kon k'rek iak wolon

ilokithak ana arttot nothokkot lon ilokithak, inenni nothikkie ka kon iak wolon iloporot ilathikienon tho'rillir. ²⁰ Anakka onon thokat iak wolon ilokithak, onon thellat inyaun nyolon iloporot tokit koKapik. ²¹ Ngintha akka onon thiothe ca'ri cen nti ilon ilokithak ilanon thothianet cik inenni, lon len lonat thio. ²² Anaruk inenni onon thei thelikkakot nti ilon ilokithak ana onon thothakkat iak woKapik ana lon ilanriot ntit lathikienon thupupure ana lon len itti thikkoik thothupuththuput. ²³ Akka lon ilokithak lana thio anaruk thethet nuthuk thoKapik thana thikkoik thothupuththuput iaMiccie oIeccuo Ili wonnon.

7

Thelikkako nti ilon lothonce'ret lon cik

¹ Pangkingon, onon thomma itti mpaik perene ul iina lon lothonce'ret lon cik itti lakkma ul iaik ngkit thapat tulluki? ² Ammakka lon laik, pul ipittat ponu itti paccikot olle akkwaik ngkit thapat anaruk amma olle akkiot ana pelikkako nti ilon elli appik. ³ Anaruk amma pul ipopari pittat alle parthuk paik pakinnio, pokkothe lon ilokithak. Anaruk amma olle piot, kwella lon cik ilokithak antoka manna itti pipo pul p'rek kwella lon ilokithak ana manna kwipo p're p'rek.

⁴ Pangkingon, onon thillethe ilon loIeccuo lothonce'ret lon cik othakka itti annoka thopilin, annoka thokkwi ipurokot nti ithio othakka itti aron okkinthet Kapik lon loporot. ⁵ Lon lothonce'ret lon cik lurokiet lon ilokithak ilaik iaron ana lonakathe thio akka oron thokat inyaun nyolon ilokithak. ⁶ Anaruk inenni oron

thakonnoka inyaun nyolon lothonce'ret lon cik p'rin, oron thelikkakot nti ilon lothonce'ret lon cik othakka itti aron oreko ngkathar ikie koKanang ikupupure ana okonnoka ngkathar ikipe ikokurrakothaik.

Thro ilon ilokithak

⁷ Oron thi're tatththa? Lon lothonce'ret lon cik lalon ilokithaki? Okonnoka menik, akka mpakannainat lon ilokithak amma lon lothonce'ret lon cik lellat. Akka mpakannainat thoccot kit na'rupu woul amma lon lothonce'ret lon cik lakinni're itti, "Nokorronno occot kit na'rupu woul." ⁸ Anaruk lon ilokithak akkoko-rronnorin anongat a'rupu. Akka amma lon lothonce'ret lon cik lella ana lon ilokithak lella. ⁹ Mpokat cik anikkoik poporot amparthuk ina lon lothonce'ret lon cik. Anaruk akka lon ilonthomat laat, alon ilokithak i'rikat iaun ana mpiathe. ¹⁰ Mpaththiot itti lon lothonce'ret lon cik ila oMucca ponat ilokat lonu itti lana thikkoik lonat thio.

¹¹ Akka lon ilokithak likkathaik alamikkothin llon ilonthomat anianthet lon len. ¹² Icci lon lothonce'ret lon cik ana lon len ilonthomat lupupure ana laik icat ana loporot. ¹³ Lon ilokat loporot akkokkwothini? Okonnoka menik, anaruk elli lokkattathe othakka itti alon ilokithak inako itti lalon ilokithak, lonat thio iaun llon iloporot, othakka itti alon ilokithak oka lon ilokithak nti ilon ilonthomat.

¹⁴ Oron thina itti lon lothonce'ret lon cik lupupure anaruk mpakannoka pul polon loKapik mpokettathe lon ilokithak ere piak

polon ilokithak. ¹⁵ Mpomma lon ila mpaik pakkot. Akka ila mpongothe itti mpakkot, mpaik pakannokkot anaruk ila mp'rat mpaik pakkot. ¹⁶ Ana amma mpakkot ila mpakannongkot itti mpakkot ana mpangat itti lon lothonce'ret lon cik loporot. ¹⁷ Ittina oun akkaik pakannokkot lon elli ilokithak appik, anaruk lon ilokithak ilaik iaun akkaik lakkot. ¹⁸ Mpina itti lon lella iaun iloporot ana kannan ika k'rek ikokithak, akka mpongothe itti mpakkot lon iloporot anaruk mpomma okkot lon len. ¹⁹ Akka lon ila mpaik pakkot lakannoka iloporot ila mpongothe itti mpakkot mpakannangkot itti mpakkot anaruk lon ilokithak akkaik lanemothin nan mpokkot. ²⁰ Menik amma mpakkot lon ila mp'rat itti mpakannokkot ittina oun akkaik pakannokkot lon len anaruk lon ilokithak ilaik iaun akkaik lakkot lon len.

²¹ Ittina mpaththiot itti lon lothonce'ret lon cik laik lareko, amma mpongothe itti mpakkot lon iloporot, alon ilokithak okaik iccik kin. ²² Akka mpongothe lon lothonce'ret lon cik nci nocikit. ²³ Anaruk mpaik pakathacce lon lothonce'ret lon cik laik ire ika kin k'rek, laik lorro ilon lothonce'ret lon cik loca cin alothikkien piak polon lothonce'ret lon cik ilokithak ika kin k'rek. ²⁴ Mpella utha woporot noka ana oththa akka'rethin nti ika engki kothio. ²⁵ Ittina athopira noka oka noKapik nti ia oIeccuo oMiccie Ili wonnon. Ittina oun ngka kin ana ngathe're ngin oka iak wolon lothonce'ret cik loKapik, anaruk aka kin oka piak pothonce'ret lon cik lolon ilokithak.

8

Thikkoik ngKanang koKapik

¹ Ittina, inenni thakkmako thella nakkwion ithaik okin oIeccuo oMiccie, ² akka nti ilon loMiccie oIeccuo, lon lothonce'ret lon cik loKanang kothikkoik lelikkorin nti ilon lothonce'ret lon cik lolon ilokithak ana lothio. ³ Akka lon ila lon lothonce'ret lon cik loMucca lokat lommat okkot, lokat lommat akka lon lonnon ilokithak ilaron thokwontat ngngin, anaruk Kapik kokkathe lon len nthothiöt ukul wung ntan ngka kungkot kopul iponyi athoka papu pothokiot ngüccük cik nti ilon ilokithak. Ana oIeccuo popa'rekathe lon cik ilokithak nti ipul ipokithak. ⁴ Othakka itti alon ila lon lothonce'ret lon cik longothe itti laka iaron aloka iaron oron ithaik thakannikkoik ammakka ka ikonyi ikokithak kongothe anaruk ammakka Kanang koKapik kongothe.

⁵ Okkwion ithaik thikkoik ammakka ka ikonyi kongothe, okin thaik thammakot lon ila ka ken kongothe lulluk ilokithak anaruk okkwion ithaik thikkoik ammakka Kanang koKapik kongothe okin thaik thammakot lon ila Kanang koKapik kongothe. ⁶ Ngathe're ngopul polon ilokithak ngiot anaruk ngathe're inga Kanang koKapik kaik nan ngaik ngküt thapat ana ngoporot, ⁷ ngathe're ngolon ilokithak ngorro ilon loKapik. Ngakannocikot lon lothonce'ret lon cik loKapik ana ngakannoreko llon len. ⁸ Okkwion ithaik thammakot lon ila ka ikonyi kongothe, thakannopirie Kapik noka.

⁹ Anaruk onon thaik thakannommokot lon ila ka ikonyi kongothe anaruk onon thaik

thammakot Kanang koKapik amma kaik ianon. Ana okkwi ipella Kanang koMiccie kwakannoka poMiccie. ¹⁰ Anaruk amma oMiccie paik ianon, ka kon killet nti ilon ilokithak anaruk icci Kanang koKapik kaik ianon akka onon thoporot tokit koKapik. ¹¹ Ana amma Kanang kokkwi ipurokiet oIeccuo nti ithio kaik ianon, okkwi ipurokiet oMiccie nti ithio pethet ka kon thikkoik ngKanang kokkwi ipaik ianon.

¹² Ittina pangkingon oron thouu itti oron thakannikkoik thikkoik thoka ikokithak. ¹³ Akka amma onon thikkoik thikkoik thoka ikokithak ana onon thille anaruk amma onon ikkoik ngKanang koKapik onon thakkwot lon ilokithaki ilaik ika kon ana onon thakkoik. ¹⁴ Ana okkwion itha Kanang koKapik kaik nan, okin thanyukul nyoKapik. ¹⁵ Akka onon thakan-nocco Kanang ikathakkienon iak annipo n're at-tang anaruk onon thoccot Kanang ikathikkienon nyukul. Ana ngKanang ken oron thakkaru itti, "Appa, ngappa ponnon." ¹⁶ Kanang ikupupure koKapik ngkanang konnon thakene itti oron thanyukul nyoKapik. ¹⁷ Ana inakka oron thanyukul nyoKapik, oron ana Kanang thapakkot na'rupu woKapik ia kapponekkenthet ton cik ana oMiccie, amma oron akkaik thaccokot thiak oron oMiccie, othakka itti aron oka ithrik oron aththut.

Thrik ithanthan

¹⁸ Mpakatha itti thocokot thiak thonnon enthi, thakannoka ammakka thrik ithathittako ncik iaron. ¹⁹ A'rupu wonocapu waik wa'rikot nyukul nyoKapik kannan itti wakenetta kin. ²⁰ Akka

a'rupu wonocapu appik wonat n're ana n're nen nokat nipiettat kin ngKapik ikokkothe capu aul ona tho'rikot cik. ²¹ Othakka itti a'rupu ncik appik elikkako nti ithoccokiettat thiak tholon ilokithak akin onakatta ithrik nuthuk thonyukul nyoKapik.

²² Oron thina itti a'rupu ncik appik wokot accokot thiak manna inenni ere thok'rellako thokkul amma akwonta ak'rello pul ipakwono.

²³ Okorronno oka menik tulluk, anaruk oron ngka konnon ithonu Kanang koKapik, thaik thac-cokot thiak aron thaik tha'rikot thelikkako thoka konnon kannan ana thoka konyukul nyoKapik.

²⁴ Akka itho'rikot cik enthi oron tho'rettathe. Anaruk tho'rikot cik ithimmako thakannoka tho'rikot cik. Oththa akka'rikot lon ila kwimmat ngkit? ²⁵ Anaruk amma oron o'rikot a'rupu iaron thella oron tha'rikot nthoccokot mikit.

²⁶ Menik, Kanang koKapik kittarot ton ithom-maik thonnon. Oron thomma lon ilaron thaik tha'rane nga'rama anaruk Kanang ikupupure akka'raneron nga'rama llon ilommakot. ²⁷ Ana okkwi ipakwancot mikit monnon pina ngathe're ngoKanang ikupupure akka Kanang ikupupure akkakinthet ul iupupure woKapik lon ila Kapik kongothe.

²⁸ Ana oron thina itti ilon appik Kapik kaik karekine ul iongothok, okin ithakkarakothe llon ila kwakkarothekin. ²⁹ Akka kinat ul ia kakkarot ana kakkarot kin akin oka ere ukul wung won-thon othakka itti aukul wung ina akka aka ukul wonothon itho'rkit thopangon appik. ³⁰ Ana okkwion itha kinat kakkarot ana okkwion itha

kakkarot, kwothikkiet kin thung ana okkwion ithothakkat thung, kwothikkiet kin thrïk.

Thongat thoKapik

³¹ Oron thathïot lon elli tit taththa? Amma Kapik kaik naron oththa akkalkot ton? ³² Akka kakann'ra nukul wung anaruk kwethet ton ngok ana kwakorronno ethet ton a'rupu appik okin opei nuthuki? ³³ Oththa akkakkma ul ia Kapik kothikkiet woporot? Kapik kulluk akkakkma kin. ³⁴ Oththa pen akkappakkma? OMiccie oIeccuo ipiot ana ipurokiettat nti ithio ana kwaik thokkun wothothari woKapik ana ook akkerene Kapik nti iaron. ³⁵ Oththa akkapetoron nti ithongat thoMiccie? Thïrro mïkït nti ikaraki, thokinyai, thocokot thiaki, tïi, thikkoik munthuri ana manna thokkuttat ngk'rittang ikukwiri? ³⁶ Ammakka lokurrakot itti,

“Onïn thille nti ilon lang,

Onïn thikkoik ere lungkat ilathongutta.”

³⁷ Aa, ia'rupu enni appik oron thou pu'ran poIeccuo okkwi ipongotheron na'rupu ialkotheik. ³⁸ Akka mponu noucce itti papu pella ipapetoron nti ilon loKapik, lakonnoka manna thio ana manna thikkoik ana manna u'rupa wothothilettat woKapik ana manna u'rupa iokithak ana manna pu'ran p'rek. ³⁹ Ana manna okonnoka pap'rek iprïk ana pothothïrïn ana pap'rek nti ia'rupu ia Kapik koku'ret ncik ana nothongat thoKapik ithaik iaMiccie oIeccuo Ili wonnon.

9

Kapik ana ul ia kwakkarot

¹ Mpaik pere lon ilaik icat tokit koMiccie ana mpaik pakannammikkot ana cikit cin cakene itti lon len laik icat ngKanang ikupupure. ² Mponu thiak nocikit thoul win kannan ana thiak then thomma oco'ro nocikit. ³ Akka oun ngka kin mpappongothe itti mpattattako ana opa'rettaik nti ilon loMiccie, nti ilon lopangkingon ithanin thaul woIouth. ⁴ Okin thaul woIccereil ia Kapik kakkarot itti waka nyukul nyung inya kwokenet thrik thung ana thonekket lon cik ana ethet kin tupan toKapik ana ethet kin lon lothonce'ret lon cik. ⁵ Ul ittittik wathiki then ana oMiccie ngka kopul iponyi ana Kapik koul appik pokwontat nti iul wen, aKapik ethiethok cik thupuththuput. Amin.

⁶ Lakannoka itti Kapik kakorronno occot kit nolon ila konekketheik. Akka thiki thoIccereil appik thakannoka ul woIccereil appik. ⁷ Ana okorronno oka itti akka okin thathiki thAprein, okin appik thanyukul nyAprein. Anaruk "Thiki thang thaka thoppot ngk'ran koIccaak." ⁸ Elli lonu itti nyukul inyokwontat ngkathar koul ionyi akkakannoka thiki thoKapik anaruk nyukul inyonekkettanhet lon cik akkathiki thAprein. ⁹ Akka lon ilonekkettatheik lokat li'rettat itina, "Mpakkaprttako ntan thuput th'rek noca'ri enci ana mpathiot oCcara akkwonu ukul." ¹⁰ Okorronno oka menik tulluk anaruk oRepekka

cakuruk pokwonot nyukul inyonat oththan pulukku ana ook pen ongappa ponnon oIccaak.

¹¹ Anaruk akka laro larthuk okwonta ana manna okkot lon lokithak ana manna iloporot othakka itti alon loKapik o'rungkwot cik ¹² okorronno oka nngngre ng'rek iokkattathe ioporot anaruk nti ilon ili'rettathe oRepekka itti, "Ukul irik akkarekine opang ipotte."

¹³ Ammakka lokurrakot iatham itti, "Mpongothe oIakup anaruk mp'rat oIcco." ¹⁴ Oron thi're kaththa? Kapik komma once'ret lon ciki? Okorronno oka menik kirrkkir. ¹⁵ Akka Kapik ki'rethe oMucca itti,

"Mpipo thiak thokkwi ipa mpongothe itti mpipo thiak then,
ana mpangat okkwi ipa mpongothe itti mpangat."

¹⁶ Ittina lakannoka itti laka ammakka pul iponyi pongothe ana manna ila akwokwantot anaruk ammakka thiak thoKapik. ¹⁷ Akka atham woKapik wi'rethe oPoroun itti, "Mpothikkierung ili othakka itti anokene pu'ran pin iaung ana othakka itti ak'ran kin inako nocapu." ¹⁸ Ittina Kapik kipo thiak thokkwi ipa kongothe itti kipo thiak then ana kwanthomie opilingon ma itha kwongothe itti kwanthomie ma.

¹⁹ Opilin nti ianon pamethin itti, "Ittina ngintha akka Kapik orukwenthet ton? Oththa akkace're lon ila Kapik kongothe itti kakkot?"

²⁰ Anaruk onon oththan akka annipittot Kapik

lon ila kongothe itti kakkot? “Papu ipa opit pokkothe pipittot opit itti ngkwokkothin ittina akainthai?” ²¹ Pul ipakkot api pakannoka ponu lon ikkun itti pakkot api ammakka kwongothe itti kwakkori? Ikaine nili akwokkot koporot ana ikaine ul nuthuk akwokkot kennangi?

²² Laka taththa amma Kapik kongothe itti kakene ul thua ka thung ana okene pu'ran pung, kaccokot cikit kiththik noul ia kuat ka ken ana nothokittoik itha kokat konu itti kakittoik, ²³ Kwokkothe elli akwothikkie tha'rthan thothrik thung inako nan kannan noul iakwokene thiak thung okin ithokuccekittanthe thrik thung cik nci ma'rot.

²⁴ Ana manna oron itha kwakkarot, okorronno oka ul wulluk woIouth anaruk ul iakannoka woIouth. ²⁵ Ana ammakka kwokurrot iatham wopul iperntet lon loKapik oUcca itti, “Mpakkaro kin itti ‘Ul win’ okin ithakannoka ul win, ana mpakkaro kin itti, ‘Ul ia mpongothe’ okin itha mpakannoka pongothe,”

²⁶ ana, “Elli lakaik noka'ran na lokat li'rettathekin itti, ‘Onon thakannoka ul win,’ anaruk itti okin thakkaroko itti, ‘nyukul nyoKapik kothikkoik.’ ”

²⁷ OIccaia pul ipernte lon loKapik perethe ul woIccereil itti, “Amma maun moul woIccereil mantoka moppot ere thamur thorirok irapangka okin ithokwentakot thotteik akka'rettat.

28 Akka Kapik kakkot lon lung nocapu accokkot ana papenang.”

29 Ilen elli ammakka pul ipernte lon loKapik oIccaia pappi'ret ma'rot itti,
 “Amma Kapik kokat kakorronno okwentineron thiki,
 oron thakat ere ul wonoka'ran koCcothum ana koKamura.”

Ul woIccereil ana oMiccie

30 Ittina oron thi're taththa? Akka ul iakanoka woIouth iakannoka woporot tokit koKapik wiothe thoporot tokit koKapik. Okin thiothe thoporot tokit koKapik nthocokot lon nomikit.

31 Anaruk ul woIccereil iokat cik ammakot lon lothonce'ret lon cik loMucca itti alothikkiekin thoporot tokit koKapik wakinniot thoporot then tokit koKapik.

32 Nthina itti akainthai? Laik menik akka wellat thocokot lon loKapik nomikit men anaruk okin thokat akin ome itti okin thathakka thoporot tokit koKapik nthokkot ngre. Ittina okin thomukkwathe “Noththok ipamukkietto.”

33 Ammakka lokurrakot itti,
 “Katha mpanekket pothok noka'ran koCiun ipamukkwie ul
 ana kancang ikallekkie ul.
 Ana okkwi iponekkethe cikit nolon lung ana kwakannothiettaik kirrkkir.”

10

1 Pangkingon, lon ila mpongothe nci nocikit kannan ana a'rane Kapik nga'rama itti aul

woIccereil iot tho'rettat. ² Mperet kin itti tat akka okin thongothe Kapik ngka ken kirrkkir, anaruk thongat Kapik then thakin thakinnina lon ilaik icat. ³ Ana inakka okin thomma thoka thoporot tokit koKapik ithaat noKapik, ana akin okwancot athen thellek, okin thakannangkot itti okin thathakka thoporot tokit koKapik. ⁴ OMiccie poce'ret lon lothonce'ret lon cik othakka itti aul appik ioccoothe lon loKapik nomikit iot thoporot tokit koKapik.

Tho'rettat thoul appik

⁵ OMucca perethe itti pul pathakka poporot tokit koKapik nthocot kit nolon lothonce'ret lon cik ngkathar engki, "Pul ipakkot lon elli kwaccot kit nan akkwaik ngkit thapat." ⁶ Anaruk thikkoik nthocokot lon nocikit thi're itti, "Kirrnni omet nocikit cang itti, 'Oththa akkaku'rot tothi'rot?'" (othakka itti akwathona oMiccie ntan nocapu). ⁷ "Ana manna itti, 'Oththa akkuo thothirin?'" (othakka itti akwothurokie oMiccie nti ithio). ⁸ Anaruk lon len li're taththa? "Lon loKapik laik iccik kang ana nothon thang ana nocikit cang" ilen lothocokot lon nomikit loKapik ilanin thaik thangkene. ⁹ Ana ittina amma oung akki'ret nthon thang itti "Oieccuo ook Ili," ana occokot lon nocikit itti Kapik kurokierok nti ithio, ngkwa'rettat. ¹⁰ Akka ngkwaccokot lon loKapik ncikit cang ana Kapik kothikkierung poporot ana ngkweret lon len nthon thang ana ngkwa'rettat. ¹¹ Ana ammakka atham wi'ret

itti, “Okkwi iponekkethe cĭkĭt naak kwakorronno othiettaik.” ¹² Akka ul woIouth wakannoka threk noul iakannoka woIouth, okin thulukku ana Ili wulukku woul appik ioccoke the lon lung ana wethie ul appik ipittothok lon. ¹³ Akka “Okkwion itha'ra nga'rama ngk'ran kung, tha'rettat.”

¹⁴ Anaruk okin tha'ranok nga'rama taththa amma okin thommak? Ana okin thaccokot lon lung taththa amma okin thakannocĭkot lon ilerethok? Ana okin thaccĭkot lon taththa amma lon lakannongkenetta kin? ¹⁵ Ana okin thangkene lon loKapik taththa amma okin thakannothilat? Ammakka lokurrakot itti, “Ul woporot kannan ithongkene lon iloporot loIeccuo.”

¹⁶ Anaruk ul woIccereil wakannangkat lon iloporot loIeccuo appik. Akka oIccaia pul ipernte lon loKapik pi'ret itti, “Ili, oththa akkocokoke the lon nocĭkĭt ilanĭn theret?” ¹⁷ Ittina thocokot lon nocĭkĭt thanthan nothocĭkot lon, ana thocĭkot then tholon ilongkenettat loMiccie.

¹⁸ Anaruk mpipitto itti okin thakannocĭkori? Okin thocĭkoke the, akka atham wi'ret itti, “Po're pen peot nocapu na'ran appik ana lon len leot nocapu ncik appik.”

¹⁹ Mpappipitto attang itti ul woIccereil wakinina loni? Cittokĭt oMucca pi're itti, “Mpakorronnonon annua ka koul iotte wonomothok m'rek, Mpakorronnonon annua ka koul iommaik.”

10:11 10.11 Iccaia 28.16 **10:13** 10.13 Ioil 2.32 **10:15** 10.15 Iccaia 52.7 **10:16** 10.16 Iccaia 53.1 **10:18** 10.18 Mocumur 19.4 **10:19** 10.19 Thethinia 32.21

²⁰ Ana oIccaia pul ipernte lon loKapik pi'ret lon nci nokkit itti,
 “Mpincathe nul iokat cik akorronno okwaricathin,
 Mpokenet ul ka kin iakannipitton.”

²¹ Anaruk oIccaia perekathe ul woIccereil akwi'rekat itti, “Mponthinthet ul nyaun kapik nokkonokki iakannocikot lon lin ana ionthomat ma.”

11

Kapik kakann'ra ul wung

¹ Mpipitto itti, Kapik k'rat ul wungi? Anoka menik oun ngka kin poul woIccereil nothiki thAprein ana nopothok poPeniemin.
² Kapik kakann'ra ul wung ia kwakkarot. Onon thomma tat akka atham wi'ret aeret ollia akka kwa'rettot iKapik akwa'rettine ul woIccereili?
³ Akwi'ret itti, “Ili, okin thongwot ul wang w'rek wothernte lon lang ana okin thokittot nu'rot na'rama nang ana oun akkokwentakot pellek ana okin thongothe itti okin thakkwothin.” ⁴ Ana Kapik kothianthok tit tat? “Mpo'rumot noul athar we're'rapuruk (7,000) iakanna'rane oPaal nga'rama.” ⁵ Ana inenni ul waik iokwentakot wotte ia Kapik kakkarot nthoporot thung. ⁶ Ittina amma thakkarako thaik nthoporot thoKapik ana thakannoka nngre ana amma Kapik kokat akkakkaro ul, akokatha ngre ngen menik thoporot thoKapik thakannokat thoporot.

10:20 10.20 Iccaia 65.1 **10:21** 10.21 Iccaia 65.2 **11:3** 11.3
 1 Nili 19.10, 14 **11:4** 11.4 1 Nili 19.18

⁷ Ngintha akkokakatheik? Akka ul woIccereil wakinniat lon ilakin thokat akin okwancot. Ul iotteik akkiothe anaruk iokwentakot wokot wonthomiettat ma, ⁸ ammakka lokurrakot iatham itti, “Kapik kethet kin ngathe're ngonu ngore

ana kit kakannimmaik

ana unu wokannoccikot cik manna inenni.”

⁹ Ana oThauth pi'ret itti,

“Akuppu'rung kothu'rit ken oka tupu ana lo'rak lothi'riththa,

ana papu ipammukkietto akin occo lon ilakin thonu itti okin thacco,

¹⁰ Akit ken i'rimat othakka itti akin okorronno immaik

ana aucul wen u'rumako thupuththuput.”

Tho'rettat thoul iakannoka ul woIouth

¹¹ Mpappipitto itti, ul woIouth wommukkot itti wapukko a'rungkat nocapu thupuththupuri? Annoka menik anaruk nti ilon len ilokithak tho'rettat thakkakanthet ul iakannoka ul woIouth othakka itti aul woIccereil ipo no're noul iakonnoka woIccereil. ¹² Anaruk amma lon ilokithak loul woIouth lonu itti tha'rthan nocapu ana thapukko then thonu itti tha'rthan thoul iakannoka woIouth, tha'rthan thaka taththa amma wokkaprttakot ntan appik.

¹³ Mpaik perenenon, onon ul iannoka ul woIouth ana ammakka mpapul pothothilettat poleccuo iperene ul iakannoka woIouth, mpopirat noka nore ngin ¹⁴ othakka itti anipie ul win w'rek no're othakka itti ano'ret opilingon nti iakin. ¹⁵ Akka Kapik kopa'rinet ul woIouth cik,

kokkathē thuruko nul w'rek nocapu. Ana akka kopakkethē ku'ri cik nul woIouth, thaka thikkoik thoul illet. ¹⁶ Amma mīl motte nopangken imetathē Kapik mupupure, am'rek maka mupupure appik. Ana amma laka lopira lupupure ana u'ri wen waka wupupure cakuruk.

¹⁷ Amma u'ri wopira w'rek wokat wongattathēik, ana onon u'ri wopira ipumothē ncik wurakothē nopira ipettat ittina onon thaik thupokko annolaka ithun nu'ri wopira ipettat, ¹⁸ nokorronno ipintheṭ u'ri wopira ka thoura ipettat amma onon akkokkothē menik annocot kit nan itti onon thaik thakorronno othingkariet laka tan anaruk laka akkaik lathingkariet non tan. ¹⁹ Anaruk ngkwi're itti, "U'ri warongattathēik othakka itti anurakot noka'ran ken." ²⁰ İcat. Warongattathēik akka wakannocokot lon nocikīṭ anaruk ngkwocokothē lon nocikīṭ. Kirrnni ipot ka thoura anaruk ipi n're. ²¹ Akka amma Kapik kakkannonekket u'ri wopira cik ipettat kakannonekkethung cik cakuruk.

²² Nantokatha tat akka Kapik koporot ana konthomathē nolon, konthomathē nakwion ithapukkot anaruk konu thiak thon amma oung akko'rungkothe ithoporot thung. Anaruk amma ngkw'rat ana ngkwamothakot cik cakuruk. ²³ Ana amma okin thakann'ra o'rungkot nohocokot lon nomikīṭ, okin thurakot akka Kapik konu pu'ran itti kappurot kin attang. ²⁴ Ana amma ngkwokeccathēik nopira poCeiththun ipumothē ncik ana ngkurakothē nopira poCeiththun ipettat, laka taththa nou'ri wopira ipettat

amma wongattatheik ana wurakothe nopira pen ipakin thokat nan.

Ul woIccereil wa'rettat appik

²⁵ Pangkingon, mpongothe itti onon thina kumitta kolon loKapik othakka itti annokorronno ipot ka thoura. Ul woIccereil wokat wonthomat ma mono aul iokat iakannoka ul woIouth occokat lon loKapik. ²⁶ Ul woIccereil appik

watho'rettat ammakka lokurrakot itti, "Okkwi ipa'ret ul panthan noka'ran koCiun icarak coman coUrucclim.

Ana kwapa're lon ilokithak cik nothiki thoIakup.

²⁷ Ana thonekket lon cik thiin enthi inaththungon amma anonekot kin lon ilokithak len."

²⁸ Ul woIccereil woppot w'rat lon loKapik, ana elli loporot nanon ana nolon loul iakkarakot okin thongakothe nti ilon lothiki. ²⁹ Akka thakkaro ana thethet nuthuk thoKapik thakann'rako.

³⁰ Onon ul iakannoka woIouth thokat th'rat Kapik ca'ri c'rek. Anaruk inenni ul woIouth w'rat lon loKapik ana onon thokenettat thiak.

³¹ Ana ittina okin th'rat lon loKapik othakka itti akin ipako thiak then cakuruk ammakka Kapik kipot thiak thon. ³² Kapik kopa'ret ul maik appik, 'ra occikot lon lung othakka itti akipo thiak then appik.

Thopirane Kapik noka

³³ Kapik akkonu tha'rthan ana thinaik nti ica thrik ana thina lon

ana ook iparon thomma thonce'ret lon ncik
thung
ana omma thokkot lon thung ana athar
wung.

- 34 “Opilin paik pina ngathe're ngoKapiki?
Ana manna opilin paik pi'ret Kapik itti
okkothe ittinai?”
- 35 “Opilin paik pethet Kapik pap'reki itti ak-
wathokketta ntiri?”
- 36 Akka nti iaak ana ook ngngin a'rupu wa-
pakkinthok appik.
Athrik oka noKapik thupuththuput. Amin.

12

Thikkoik ithie iaMiccie

¹ Pangkingon, mperenon nthiak itha Kapik
kongotheron ngngin itti onon thethet Kapik
kakon ammakka a'rupu wothokiot ngüccük
cik ipupure iapirie Kapik noka, kathar en-
gki ika anon a'rane Kapik nga'rama ngngin.

² Nokorronno othakka ammakka ul wonocapu
enci anaruk noprttakoik nthoportto thokwart-
tikot cik thon, annina akka annenekke ana ina
lon ila Kapik kongothe, ana thoporot thung
ithapiriek noka ana thella lon lokithak.

³ Ana nthoporot thoKapik itha kwethin,
mpi'ret non appik itti nokorronno occot kit
nokakon itti nthoporot kannan, anon thakan-
noka thoporot anaruk nokwarttikot cik pa-
penang anokkat lon ammakka thocokot tholon
nocikit thoKapik itha Kapik kethet non. ⁴ Ana

ammakka pul ponu ka kulukku ana ka konu nyaun ana unu ana tacok ana kinyce ana kit ana ca anaruk ka ken konu ngre kurekkurek, ⁵ ana ittina iaMiccie oron ithoppot thakkot ka kulukku ana oron thi'rikikkarothe tan appik kurekkurek. ⁶ Oron thou lon kurekkurek ammakka Kapik kikketheron nuthuk nthoporot thung. Amma Kapik kethung thu're itti ngkwerene ul lon loKapik aere nthocokot lon nocikit ammakka Kapik kethung. ⁷ Amma thoreko ngre akworeko ana amma thongkene akwongkene, ⁸ ana amma thomereket ul llon iloporot, akwomereket ana amma tha'rintinthe ul a'rupu iella a'rupu cik akwethe nycikit coporot ana amma thoka ili akwoka okkwi ipakkot lon nthiak ana nthongat nocikit ana amma okene thiak akwokene nthongarot.

Thongarot

⁹ Thongarot thou itti thaka icaricat. N'ra lon ilokithak annocokot kit nolon iloporot. ¹⁰ Nothiarne cik appik karkko nyukul nyoththan pulukku ana othiarneik. ¹¹ Nokorronno ipo ngore iire, anaruk norekine Ili ngka kon appik. ¹² Nopira noka notho'rikot cik thon, ana occokot mikit ilon ilokithak ana a'ra nga'rama appinappin nthocokot lon nocikit. ¹³ Nittarot ul iupupure woKapik na'rupu iakin ipitto ana okkinthe lon loporot.

¹⁴ Nipittot Kapik akethie ul iakkiet non thiak ana okorronno attatta kin. ¹⁵ Nopira noka nnul iaik wapira noka ana oo nnul iaik woo. ¹⁶ Nikkoik tothun thoporot. Nokorronno ipot ka

thoura anaruk noccikarot ana annikkoik nnul appik ia'rthan ana iakannoka ia'rthan.

¹⁷ Nokorronno okke lon ilokithak llon ilokithak. No'rumoik annokkot lon iloporot tokit koul appik. ¹⁸ Amma kathar kaik ammakka akatha ngka kang annoka iku'ri nnul appik.

¹⁹ Pangkingon, nokorronno okketta anaruk nokirrninthe Kapik lon len akka lokurrakot iatham itti, "Kapik ki'ret itti thokke thaun akka akke ana oun akka akkiet ul thiak iokkiethe pangken thiak." ²⁰ Okorronno oka menik,

"Amma pul ipanon thouu tho'rak paat, ethet
thu'rit apo'rko

amma pica pokkwothok, aethok ng'ri
akwikko.

Akka amma akkot ittina ngkwaik pathiek cik."

²¹ kirnni okorronno lon ilokithak itti lalkothung anaruk alkothe llon iloporot.

13

Noccikot nili

¹ Ul appik wonu itti waccikot nili akka ngili appik nganthan noKapik. Ngili ia nili non nonu inenni ngaKapik akkethet kin. ² Ittina okkwi ip'ra lon lonili, kw'rat lon ila Kapik konekketheik ana okkwion ithakkot menik thanane ka kung thakkamako. ³ Akka nili nakorronno ipie okkwion ithakkot lon loporot n're anaruk nipie okkwion ithakkot lon lokithak n're. Ngkwon-

gothe itti ngkwakannona n're nonili? okkothe lon iloporot ana okin thamerekethung. ⁴ Akka

12:19 12.19 Thethinia 32.35
ncik 25.21-22

12:20 12.20 Thokkwie lon kuru

okin ul iarekine Kapik iakkinthung lon lo-
porot. Anaruk amma ngkwokkothe lon lokithak,
aipo n're akka nili nakorronno onneko i'rittang
iukwirukwit nuthuk. Akka okin ul iarekine
Kapik, okin thothillathe itti okin thakke thua
ka thoKapik noul iakkot lon moloko. ⁵ Ittina
loporot itti oron thaccikot lon lonili annoka
tulluk itti oron thapellene thakkmako anaruk
oron thapellene mikit monon cakuruk. ⁶ Ilen
akka anon ikkentheth nili akucci wothe'rntot
akka nili narekine Kapik amma okin okkot ngre
papenang.

⁷ Nethet ul kamucu ikakin thonu nanon, amma
ngkwonuwu itti ngkwetheth akucci wothe'rntot aethet,
ana amma a'rupu arttot nan aethet ana
amma thothia cik aethet ana amma thothiakine
cik athiane okkwion ithonu itti okin thathiakine
cik.

Nongarot akka ca'ri cakko napuththut

⁸ Apul ella nti ianon iponu kamucu noka.
Nongarot appik tulluk na'rungkwot ongarot akka
okkwi ipongothe opang p'rek pomarttot lon
lothonce'ret lon cik appik. ⁹ Akka lon ilonthomat
ilattul ili'ret itti, "kirrnni a'ro nul iari ittat
ana kirrnni okkwot pul ana kirrnni omunye
ana kirrnni ona thiak tha'rupu woul," ana lon
ilonthomat ilaik la'rntakothel on lulukku itti,
"Ongathe pul p'rek ammakka ngkwongothe ka
kang." ¹⁰ Akka thongarot thakinnie pul ponocuruk
ka kongo. Ittina thongarot thamartto lon
lothonce'ret lon cik.

¹¹ Nokkot elli, annina lon loca'ri icaron thaik nan. Ca'ri caat icanon urutta ngngin nti inthe p'rin akka ma'ri motho'ret makko napuththut iccik konnon, nnoma'ri morokit akka oron thoc-cokothe lon nomikit loleccuo. ¹² Cik caik cakatto ana cingki caik cappo. Ittina ton opa'rine ngre ngori'rimak cik, aron oreko ngre ngoricngki. ¹³ Ntrun okkot lon ngkathar ikoporot ilonu itti lakkattat icingki, kirrnni okorronno ngapak itti ngakkwohung ana okorronno a'ro nul nuthuk ana manna llmo're ana illillakorit nnul ana okorronno okkinthet ul lon ilokithak ana no're. ¹⁴ Anaruk nomakot lon lolli oLeccuo oMiccie, nokorronno i'rikot occot kit nolon loka kon itti onon thamana lon ilokithak.

14

Nokorronno akkmaro

¹ Nongat okkwion ithian ithocokot lon nomikit, nokorronno akkmat kin nolon loka ken. ² Thocokot lon nocikit thopul p'rek thakorronnok akwo'rko thu'rit ncik appik anaruk opilin iponu thocokot lon nocikit thotteik thakorronnok akwo'rko a'rupu wulluk iarako. ³ Okkwi ipa'rko a'rupu ncik appik ponu itti kwakannokkot ngure nakkwi ipakanno'rko a'rupu ncik appik ana okkwi ipakanno'rko a'rupu appik ponu itti kwakannakkma okkwi ipa'rko a'rupu ncik appik akka Kapik kongothok menik. ⁴ Oung oththa akka ame itti ngkwakkma pul ipareko popul p'rek? Opit pung akki're itti pokkothe lon lokithak ana manna loporot. Kwakkoik akka Kapik konu pu'ran itti kakkiek cik.

⁵ Pul p'rek pame itti ca'ri c'rek coporot kannan noca'ri c'rek, apilingon ome itti ma'ri appik mungkwarot. Laka loporot itti pul ponu itti pana lon lung lulukku ica ila kwongothe. ⁶ Okkwi ipaccot kit noca'ri culukku, kwaik papirie Ili Kapik noka. Ana okkwi ipa'rko kapa kwaik papirie Kapik noka akka okin thapirie Kapik noka akin tharuthuk o'rkoik. Ana okkwion ith'rat o'rko a'rupu w'rek okin thapirie Kapik noka. ⁷ Akka pul pella ipakkine ka kung cik pellek ana pul pella ipine ka kung pellek. ⁸ Akka amma oron thakkoik oron thakkine Ili cik ana amma oron thille ana oron thillene Ili. Ittina amma oron thantikkoik ana manna ille oron tholli.

⁹ Akka oMiccie piot nti ilon elli ana kurokathe nti ithio itti akwoka Ili woul illet ana iaik ngkit thapat. ¹⁰ Ittina ngintha akka opilingon nti ianon akkmane opangon? Ana ngintha akka opilingon nti ianon okkot ngure napangon? Oron appik thathoco'ro tokit koprruk pothakkma poKapik.

¹¹ Lokurrakot itti,

“Ili wi'ret itti, Inakka mpaik, ul appik nocapu wonu itti wirrinin cik,
ana lu're len appik li're itti Kapik kaKapik.”

¹² Ana ittina ul appik waKapik ipittot lon ilakin thokkettethe.

¹³ Ittina ton oco'ro nti ithakkmaro anaruk ton okorronno unukkwinthet opang ponongon kathar. ¹⁴ Ana ammakka pul ipaik illi oIeccuo, mpina kicce itti thu'rit thella ithokithak ngka kung. Anaruk amma pul pakatha itti papu pokithak ana paka pokithak naak. ¹⁵ Amma

ngkwokkinthet opangkang lon ilokithak na'rupu ia'rko ngkwaik pakonnokkot lon nthongarot nocikit. kirrni okitto opangkang nthu'rit ipa Miccie pinet. ¹⁶ kirrni okorronno lon ilakatha itti loporot, alere lon ilokithak. ¹⁷ Akka ngili ngoKapik ngakannoka tho'rko thu'rit ana thikko alep'rek tulluk anaruk ngolon iloco'rotheik ana ngothomicco ana ngothopira noka iKanang ikupupure. ¹⁸ Akka amma pul iporekinet oMiccie ngre ammakka engi, Kapik kapira noka naak ana ul wangathok cakuruk akka Kapik kongothok.

¹⁹ Ittina tun okkot lon ilana thomicco ana ili'rikarottan tothun. ²⁰ Nokorronno okitto ngre ngoKapik nti ilon lothu'rit. Akka thu'rit appik thoporot anaruk lokithak itti pul pa'rko thu'rit ithakkinthet opangan th'rek lon ilokithak. ²¹ Loporot itti ngkwakorronno o'rko kapa ana okorronno ngapak ana okorronno inot pap'rek ipapa're opangkang cik nti ilon loIli Kapik.

²² Ittina lon ila ngkwoccoke the nocikit nolon elli angwothe nocikit cang ana Kapik. Loporot kannan nakkwion ithakorronno okithakie ka ken nolon ila kwangkothe. ²³ Anaruk Kapik kakkma pul iponu mikit me'rarit akka kwaik pakanno'rkoik nthocokot lon Kapik nocikit. Akka lon appik ilakkot nthella thocokot lon loKapik nocikit lalon ilokithak.

15

Thopirie ul w'rek noka

¹ Oron ithopollothe ithocokot tholon loKapik nocik̄it thonu itti oron thittarot ul iarthuk opol-
lot ithocokot lon loKapik nomik̄it ana oko-
ronnopirie ka konnon noka. ² Anaruk ton okkot
lon ilapirie opang ponnongon noka othakka itti
aron upotho kin ithocokot lon nomik̄it then.
³ Akka manna oMiccie pakannopirie ka kung
noka anaruk ammakka lokurrakot iatham itti,
“K'ret ikakin thocungkwot non kapothe naun.”
⁴ Akka lon appik ilokat lokurrakot iatham ma'rot
itti alongkeneron cik othakka itti nthocokot
mik̄it ilon ana nthittarot thaatham woKapik
aron ona tho'rikot cik.

⁵ AKapik ikethettot thocokot mik̄it ilon ana
thittarot ethet non Kanang ikakorronnonon
annoka tothun ammakka ul iammakot oMiccie
oIeccuo, ⁶ othakka itti aron ethet Kapik ana oth-
than poIli oIeccuo oMiccie thrik̄ ncik̄it culukku
ana mpo're pulukku.

*OMiccie patho'rikot cik thoul woIouth ana
iakonnoka woIouth*

⁷ Ittina noccik̄ararot ammakka oMiccie
pocik̄othenon othakka itti annethet Kapik
thrik̄. ⁸ Akka mpi'ret non itti oMiccie pothakkat
pul ipareko poul woIouth nti ilon loKapik ilaik̄
icat akwokene itti Kapik ko'rumot nolon ila
konekketheik̄ itti kakkinthet thiki then ⁹ othakka
itti aul iakonnoka woIouth ethet Kapik thrik̄
nti ithiak̄ itha kwipinetton ammakka lokurrakot
iatham itti,
“Ittina mpapiranung noka nti iul iakonnoka
woIouth,

Mpamereket k'ran kang ngkunye.”

¹⁰ Li'ret attang itti,

“Nopira noka nnul wung onon ithakonnoka woIouth.”

¹¹ Ana attang,

“Nopirane Ili noka, onon ithakonnoka woIouth appik,
Nongwinok unye wothomereket onon ap-
pik.”

¹² Ana pul pothernte lon loKapik oIccaia pi'ret attang itti,

“Pul p'rek panthan nti ithiki thoIecce,
okkwi ipanthan akwathakkma ul nomothok appik,
ul iakonnoka woIouth appik wana tho'rïkot cik iaak.”

¹³ AKapik kotho'rïkot, ethet non thopira noka ana thomicco ammakka onon thonekkethe cikït naak, othakka itti anon ona tho'rïkot cik thoppot, mpu'ran poKanang ikupupure.

OPoluc parekine ul iakannoka woIouth

¹⁴ Pangkingon, oun ngka kin pina itti onon thou lon loppot loporot ana onon thina lon ncik appik ana onon thina ittararot llon appik.

¹⁵ Anaruk mpokurrinet non lon l'rek ncinokkit othakka itti anokwarikiet non lon len attang nti ilon lothoporot itha Kapik kethin ¹⁶ othakka itti anoka pul iparekine oIeccuo iul ikannoka woIouth. Mpaik pareko karkko pul ponoppa

15:9 15.9 2 Camuil 22.50; Mocumur 18.49 **15:10** 15.10
Thethinia 32.43 **15:11** 15.11 Mocumur 117.1 **15:12** 15.12
Iccaia 11.10

toKapik, ipangkene lon iloporot loIeccuo othakka itti aul iakannoka ul woIouth oka ere a'rupu iettat Kapik nuthuk ia kongothe iopirietat ngKanang ikupupure.

¹⁷ Ittina mponu lon itti mpipot ka thoura oMiccie oIeccuo ngngin ngngre ia mpaik pakkinthet Kapik. ¹⁸ Mpakanneret lon l'rek aththik anaruk mperet lon ila Miccie oIeccuo pokkiethin itti akwokene ul iakannoka ul woIouth itti athiane Kapik cik ngngre ia mpokkothe ana llon ila mperet ¹⁹ mpu'ran polon ilommaththik ana mpu'ran poKanang ikupupure. Ittina nci noka'ran koUruccelim okkette nocik coLirikkun mpomarttot thongkene tholon iloporot loMiccie. ²⁰ Ana ittina mpokat anocot kit nan itti mpangkene lon iloporot loIeccuo noka'ran ika ul wakannocikot lon loMiccie othakka itti anokorronno uno nomillang mopilin. ²¹ Mpokkothe lon omakot lon ammakka lokurrakot itti, “Okkwion ithapilin pakannerenekin lon lung aththik thimma, ana okkwion ithakannocikot lon lung aththik thina.”

²² Katha elli akkocottitorin ma'ri moppot itti mpakannainenon.

OPoluc pongothe itti kwathomirikot ka'ran koRoma

²³ Anaruk inenni mpella ngre cik tentre p'rin nomo'rong men anaruk mpongothe nci ma'rot itti mpainenon anathomirikot non. ²⁴ Ana mpaik pa'rikot cik itti mpakatha non amma aneo noththok poIcppania anon ittarothein amma aneo

than aron thikkot cik ntit papotte. ²⁵ Anaruk inenni mpaik paeo noka'ran koUruccelim anothorekine ul iupupure woKapik. ²⁶ Akka ul woKapik nocik coMakthonia ana coKrik wongothe itti wa'rntinthet ul iella a'rupu nti iul woKapik noka'ran koUruccelim. ²⁷ Okin thokat thongothe itti okin thakkot, ana icaricat okin thonu itti okin thakkot. Akka amma ul iakan-noka woIouth woccot thethietta ithun okin oul woIouth, ittina ul iannoka woIouth wonu itti wittarot ul woIouth iella a'rupu cik. ²⁸ Ana amma mpomarttot lon elli mono anethet kin a'rupu wen iamponanet kin mpakko nanon amma aneo noththok poIcppania. ²⁹ Mpina itti amma anainenon mpanthan nthethie thoMiccie appik.

³⁰ Pangkingon mpipittot non ngk'ran koIeccuo oMiccie ana nthongarot thoKangang ikupupure itti onon thaco'rothin ithokinya thin ntharane Kapik nga'rama nti ilon lin. ³¹ Na'ra nga'rama itti aKapik o'rethin nti inyaun nyoul ikonnoc-cokot lon loKapik noththok poIouthia ana itti opangkingon ithupupure thoKapik tentre ongat ngre ngin noka'ran koUruccelim. ³² Othakka itti anainenon popirat noka ana athomirikot non thin oka thoporot nanon. ³³ AKapik kothomicco oka nanon appik, Amin.

16

OPoluc pamikko ul woRoma

¹ Mpongothe itti mpi'ret non lon lopang pon-non ipopari oPpipa iparekine ul iocckothe lon loIeccuo noka'ran koKangkkaria. ² Mpi'ret

non itti nikkiek cik ngk'ran kolli ammakka oron ikikkie opang ponnongon cik ithupupure thoKapik ana annittarothok na'rupu ia kwon-gothe itti onon thittarothok ngngin akka kwitarothe ul woppot ana ittarothin cakuruk. ³ Nomicco oPricikkila ana oKkila, onin thaik thareko inaththut ire ngoMiccie oIeccuo. ⁴ Okin thokat cik thille nti ilon lin. Mpopirat noka nti ilon len ana ul cakuruk appik iocckothe lon loIeccuo iannoka ul woIouth. ⁵ Nomicco ul iocckothe lon loIeccuo ianon thaik tha'rintattakot tuan thanen.

Nomicco opuruko pin Apiniththoc ook ipocckothe lon loMiccie cittokit nocik cAccia.

⁶ Nomicco oMeriom iporekinet non kannan.

⁷ Nomicco Anthroinikkoc ana oluniac, ku'ri kin ana okin ithokat ikorrkkor okin ul wothothilettat woIeccuo iinako kannan okin thocckothe lon loMiccie tokit naun.

⁸ Nomicco Ampilioththoc okkwi ipa mpongothe ilon lolli.

⁹ Nomicco Aropanoc okkwi ipanin thokat inoreko ilon loMiccie ana opuruko pin kannan oIciththakic.

¹⁰ Nomicco Apellec okkwi ipennekkettat ana kwinako itti kwaik ithocckot lon loMiccie.

Nomicco Ariciththoploc ana ul woruan thabung.

¹¹ Nomicco oIrothion ku'ri kin.

Nomicco ul iaron thaik unnaththut ilon lolli woruan toNirikkiccuc.

¹² Nomicco oThthirippina ana oThthirippocca, ul iari enni worekot kannan ilon lolli.

Nomicco opuruko pin kannan oPirccic, ook pul ipopari p'rek iporekot kannan ilon lolli.

¹³ Nomicco oRuppu ipa Ili wakkarot, ana onnan ipokat ere olaia pin cakuruk.

¹⁴ Nomicco Aiccinikkritthoc ana oPpilion ana Armac ana oPeththropac ana Armic ana opang ponnongon ithakin thaik aththut.

¹⁵ Nomicco oPpilolokoc ana oCulia ana oNirioc ana opang ipopari, ana Alumpac ana opang ponnongon ithupupure thoKapik ithakin thaik aththut.

¹⁶ Nomiccaro nthomiccaro ithupupure. Ul ioccoke lon loIeccuo wona'ran appik waik womico non.

¹⁷ Pangkingon, mperenenon itti onon tha'rumoik nakkwion ithillilo iul ana onkene lon ilapa're thongkeneik ithanon thongkenettat. Nopa'roik nti iccik ken. ¹⁸ Akka ul iammakka enni waik wakanno orekine Ili oMiccie wonnon anaruk okin thaik tharekine karak ken. Okin thammikkot ul ana erene lon liththiot. ¹⁹ Ul appik woccikothe lon lothoccikot lon thon, ana ittina mpopirat noka kannan nanon anaruk mpongothe itti onon thinaik papenang, annina ngimpen akporot ana ella lon cik ilokithak.

²⁰ Kapik kothomicco kakak'rot pul pothopulut cik iracok ton noma'ri motte.

Athoporot thoIli wonnon oIeccuo oka nanon.

²¹ OThimiththaoc okkwi ipanin thaik thareko paik pamico non, ana oLukkiuoc ana oIaccun ana oCcuciaththarac ku'ri kin.

²² Oun oThtharththioc ipokurrot ka'ramacak engki, mpamico non ngk'ran kolli.

²³ OKaioc okkwi ipikkierin cik ana ul ioc-cokothe lon loIeccuo appik paik pamico non. Aracththoc okkwi ipaccokot akucci wonoka'ran

ana opang ponnon oKkuarththoc thaik thamicco non. ²⁴ Athoporot thoIli wonnon oIeccuo oMiccie oka nanon appik.

Nga'rama ngoPoluc

²⁵ Athrik thoKapik ikakkot lon ncik appik onemot non cik ilon iloporot loIeccuo oMiccie peret ngngin ammakka kumitta ikakkwokenet ikamu'ruttakot ncik ncima'rot thupuththuput.

²⁶ Anaruk lummothe ncik inenni ila ul wothernte lon loKapik wokurrot ana ul wina nan appik ammakka Kapik kothupuththuput ki'ret itti aul appik othianeik ana occokot lon lung. ²⁷ Thrık thaka thoKapik pellek ikina cik oIeccuo oMiccie ngngin thupuththuput. Amin.

Lumun
Lumun: Lumun (Bible)

copyright © 2020 Wycliffe Bible Translators, Inc.

Language: Lumun

Contributor: ECS Diocese of Khartoum Translation Department

This text box needs to have content for PT9 to upload is to the DBL.
All rights reserved.

2020-11-18

PDF generated using Haiola and XeLaTeX on 23 Aug 2023 from source
files dated 29 Jan 2022

b9cb69ce-3694-5d9f-bda5-4a2243fae